



Protest članova Udruženja poljoprivrednika u BiH

### Gradani čekali podjelu proizvoda

Među okupljenima pred Ustavnim sudom BiH bili su građani koji su došli zbog podjele prehrambenih proizvoda koju je najavilo Udruženje poljoprivrednika u BiH.

"Radila sam u 'Ključu' 20 godina. Zaradilo se i ostala sam bez posla. Nemam primanja. Snalazim se svakako. Evo, i na ovaj način. Porodica mi pomaže koliko može", rekla je Sarajka Muniba Granulo.

Njena sugrađanka Sajma Ganija kaže da je čula da će biti podijeljeni neki proizvodi, te da će joj dobro doći šta god da je jer preživljava sa 170 KM mjesečno. Građanima su podijeljeni krompir, brašno, jaja i živi pilici.

### Neslaganje s protestom

Neslaganje s protestom Udruženja poljoprivrednika u BiH juče su u zajedničkom saopštenju izrazili Savez poljoprivrednih udruga Zapadnohercegovačkog kantona, Koordinacija poljoprivrednih udruga Hercegovačko-neretvanskog kantona i Federalna udruga stočara 'Planinski stočar'.

Ova udruženja navode da se ne slažu sa odredbama spornog zakona, a osuđuju i postupak Udruženja poljoprivrednika u BiH koje, kako se navodi, vrši pritisak na najveću pravosudnu instituciju u BiH.

"Ovim postupkom spomenuto udruženje je samo potvrdilo ono u što smo se svi do sada uvjerali, da se radi o isključivo grupaciji dobro plaćenih ljudi", navodi se u saopštenju.



Ustavni sud BiH donio odluku o zahtjevu za ocjenu ustavnosti

# Ukinut Zakon o zaštiti domaće proizvodnje

Maja RENER

SARAJEVO - Ustavni sud BiH ukinuo je juče Zakon o zaštiti domaće proizvodnje BiH.

Ustavni sud je utvrdio da je ovaj zakon neustavan, ali u ovoj instituciji nismo mogli dobiti pojašnjenje o razlozima za donošenje ove odluke.

"Zakon prestaje da važi dan nakon objave u Službenom glasniku BiH", naveli su iz Ustavnog suda i dodali da privremena mjera, koju su donijeli u julu, a kojom je obustavljena primjena ovog zakona, ostaje na

snazi do objavljivanja odluke.

Iščekujući drugačiju odluku suda, više od 500 poljoprivrednika protestovalo je juče pred zgradom Ustavnog suda BiH u Sarajevu.

"Za dan do dva Predsjedništvo Udruženja poljoprivrednika u BiH donijće odluku o daljnjim koracima i vjerovatno će se ići u blokadu granica", rekao je Rizah Hasanović, jedan od predstavnika udruženja u Tuzli, nakon što im je saopštena odluka suda.

Zakonom o zaštiti domaće proizvodnje bilo je predviđeno uvođenje punih carina na poljoprivredne proi-

Ispred zgrade Ustavnog suda odluku čekalo više od 500 poljoprivrednika

zvođe iz Hrvatske i Srbije. Susjedne zemlje, kao i Evropska komisija, kao i određenih bh. institucija ocijenile su da je sporni zakon suprotan CEFTA (Centralnoevropski sporazum o slobodnoj trgovini).

Zahtjev za ocjenu ustavnosti spornog zakona podnio je Ilija Filipović, predsjedavajući Doma naroda Parlamentarne skupštine BiH.

Sead Jeleč, sekretar Udruženja, kazao je da će borbu za zaštitu domaće proizvodnje nastaviti u parlamentu BiH.

Miro Pejić, predsjednik Udruženja poljoprivredni-

ka BiH, tokom protesta je istakao da je juče bio dan odluke o BiH, te da se ne radi o bojkotu hrvatskih i srbijanskih proizvoda, već da žele ravnopravnost. Dodao je da žele da imaju milijardu KM poticaja kao što je to slučaj u susjedstvu pa će poljoprivrednici sami tražiti poništenje zakona.

"Deficit od dvije milijarde KM od prošle godine pretočio se u 2,4 milijarde KM. Vlasti nam kažu da nemaju novca za poticaje, zadužuju se kod MMF-a, a dvije milijarde KM puštaju da odu preko granice. Ne tražimo da se krši međunarodni ugovor. Jasno je rečeno da svaka strana koja se osjeti ugroženom ima pravo za posezanjem

mjera. Nećemo dati pravo države da svoj narod hrani vlastitom hranom. Niko ne može proizvesti jeftinije i kvalitetnije proizvode od BiH", dodao je Pejić.

Sudijama Ustavnog suda BiH su juče tokom protesta poljoprivrednici poslali flašu kozjeg mlijeka. Protest su podržali predstavnici pokreta "Dosta", Sindikata PPDI-VUT, sindikata iz Srbije i Crne Gore, te manji broj građana.

"U svojoj zemlji štitimo domaću proizvodnju. Imate pravo da zaštitite svoje interese. Snaga je u masovnosti", poručio je juče Radan Milanović, predsjednik Sindikata ugostiteljstva i turizma Srbije.